

Purtretà bain la Val Müstair

Da vesair en la novissima Terra Grischuna

■ (anr/gc) **Gia l'editorial da l'emprima Terra Grischuna da 2016, dal redactor Christian Dettwiler, è in mini-purtret da la Val che ha ses num da la renumada claustra da s. Jon. I sa chapescha perquai ch'i vegn dà bler spazi a la muntada da quel sanctuari, vegnì declarà 1983 sco patrimoni cultural mundial da l'Unesco. En quest grond complex è bler vegni perscrutà ed a la glisch ils davos decennis. Ils resultats èn impressiuants.** La Val Müstair è ina regiun periferica. Tgi che vul subsister qua sto esser innovativ e porscher qualitad. Tschintg interpretas, che fan quai, vegnan purtretadas. Ina gronda part da la giuventetgna emigrescha e na turna betg enavos pli suenter la scolaziun. La Val Müstair è pertutgada fitg da la depopulaziun. Ella ha pers 30% dals abitants d'avant 20

onns. L'economia n'ha davairas betg lev. I dat be paucas novas industrias. Quel cumbat sco vair art da survivor vegn era tematisà cun preschentar plirs hotels istorics en la Val.

L'istorgia ha dividì la Val Müstair en duas parts tras il cunfin tranter la Svizra ed il Tirol dal sid (Vnuost). Quai ha effectuà duas gruppas differentas e marcà las relaziuns cun dus linguatgs, confessiuns, sistems politics, stadis, valutas – e quai tut be sin pitschen spazi. Differentas èn perquai era las mentalitads.

Loschs èn ils vischins da la Val Müstair da lur renumà currider da passlung *Dario Cologna*. L'identificaziun e simpatia èn uschè grondas ch'i ha num en la Val: «Nus essan Dario Cologna.» El ha purtà il num da sia Val lunsch or en il mund dal sport ed ha en patria er in fitg



Il frontispizi da la nova ediziun Terra Grischuna che sa fatschenta cun la Val Müstair.

MAD

grond club da fans. Che la Val Müstair è situada perifericamain sa mussa er en ses idiom: Il jauer. Quel vegn be discurrì, ma na scrit. Dapi l'introducziun da la scola populara è il vallader linguatg d'instrucziun. Tranter ils idioms al Rom ed a l'En datti grondas differenzas. – Dal eminent vegn documentà per l'emprima giada tras in grond project da l'Universitad da Turitg co ils uffants da la Val Müstair emprendan lur idiom rumantsch be discurrì per al mantegnair sco lur lingua materna.

Davart la Biosfera Val Müstair hai dà il davos temp gronda discussiun. I va per salvar natira e cuntrada sco in zunt prezius chapital. – Da muntada per la Val è era la Manufactura Tessanda Sta. Maria – la davosa da quel gener en Svizra. Ella è vegnida fundada 1928 e viva dals products vendids, mo era dals curs

durant las vacanzas e da fautors. Da preschent èn nov dunnas occupadas là, duas dad ellas sco emprendistas.

Varià bain – sco adina – è il Magazin da la TG. I saja be numnà ch'in vischin da Basilea, *André Schenker-Nay*, è l'autur dal cudesch «Die Surselva und Ilanz – eine Zeitreise durch vier Jahrhunderte». En egl crodan las bellas fotografias da temps passads. Mussà, descritt e declarà fitg vegn bler tras la geografia umana e fisica. Era sia consorta *Antonia Nay*, oriunda da Glion, è stada in grond sustegn per la realisaziun da quella plaschaivla ed interessanta publicaziun. – Rendì attent vegn che la «Opera Viva» inscenescha questa stad a Sursaissa il «Guglielmo Tell» da Gioachino Rossini. Fatg reclama persuentar vegn cun in fitg bel ed original placat da l'artist indigen *Rudolf Mirer*.